

八指頭陀詩集

八指頭陀詩續集卷一

釋敬安寄禪

牧牛偈示沙彌蓮舫

己亥

觀心如牧牛要將鼻孔穿芒繩在我手收放得自專勿令犯苗稼時時痛著鞭劣性既已馴乃可樹下眠人牛兩忘迹草色空芊芊努力策前修光陰勿虛捐

感事偶作

本來行脚慣何用乞心安石亂泉常咽風高雲更寒徒吟五字穩欲息一枝難萬化歸真定從他變鼠肝

自笑

寒巖枯木一頭陀結習無如文字何自笑強書塵世字
却噴倉頡誤人多

割肉燃燈供佛勞了知身是水中泡祇今十指惟餘八

余曾於阿育王寺燒二指並剜脊肉燃燈供佛似學天龍吃兩刀
昔俱胝得天龍一指禪後
汝會佛法是否童云是遂問如何是佛法大意童鑒一
指俱胝亟以刀削之再問
仍豎見指斷血流遂大悟

三月上巳後六日曾公子詠周招道俗八人雅集
浩園限韻賦詩憶前年此會至者爲易遯叟俞
壽臣陳師曾陳戴白鄭湛侯及其子叔獻與余
共七人今遯叟棲廬山湛侯宰甯鄉叔獻死京

師師曾返章門預茲會者惟予與戴白壽臣而已

龍城公子詩中史萬有羅胸富神理不妨玉樹雜蒹葭
高閣春風淡相倚名園桃李參差香詩壇獨步何堂堂
擊鉢聯吟興未已新篇擲地聲鏗鏘郊寒島瘦何足道
鳳舞龍翔得名早足山驚嶺共遨遊理窟禪宗等深造
座中諸子皆英豪其間舊雨間新交因憶前年同此會
風流雲散蒼天高支公遜叟自言爲支公後身已入廬山去迢遞
關河隔煙霧九疊屏風夢裏青何時却共東林住薄宦
猶憐老鄭虔西河有淚徒如泉陳蕃亦返章門棹三月

煙花空自鬧歡娛曾歷幾何時不堪舊苑今重到彈指
春光又一年忽驚鬚鬢已蒼然感君意氣還如昨煮葵
燒筍重開筵清議蒙情自殊眾文殊亦受維摩供漫將
禪悅答檀施強作伽陀酬雅頌明朝歸卧衡山雲寒巖
熑芋與誰分鄴侯不作昌黎死眼中之人望吾子

贈朱蘂卿太守次卽席崑崙原韻

何年仙客下崑崙欲把西江一口吞金粟前身應已悟
玉堂舊事好重論偶窺龍藏尋禪話曾讀羊碑拭淚痕
政事文章在人口不勞吃吃老僧言

贈哭庵觀察疊前韻

多生積骨等崑崙淚點都歸恨海吞別有傷心惟自哭
難將此意向人論東西南北魂無語富貴功名夢有痕

山水情濃恩怨淡

用公語

英雄本色是真言

感懷二首三四疊韻

休誇大海與崑崙彌勒能將巨口吞十世古今俱是幻
孤雲懷抱向誰論等觀佛祖袋中屑淨拭河山鏡上痕
不二法門親證入拈花一笑更無言

神游吾亦到崑崙日月雙丸近可吞蹈海求仙徒自困
生天成佛豈虛論寒巖枯木孤禪意流水桃花舊淚痕
老我津梁了無濟聊持半偈息羣言

懷黃孟樂大令江南

聽斷蓮花漏滴聲曉鐘殘月不勝情瀟湘水與秦淮水
併作離愁繞石城

贈葉吏部五疊韻

高懷直欲小崑崙雲夢胸中八九吞獨抱孤忠憂晚事
力排邪說吐清論愁聞電壞傳邊警忽見銅人泣露痕
厝火然薪時已至治安徒有賈生言

六月朔夢至一山林壑幽秀絕似剡中覺而賦此
山翠濃如潑憑虛排萬峯川原迷遠近巖壑見孤雄虎
吼將崩石雲扶欲倒松溪行正幽絕何處一聲鐘

答李佛翼公孫六疊韻

衡山突兀卽崑崙萬古雲霞自吐吞
芋火巖高香尙在石頭路滑道誰論禪宗燈續馬師派
神禹碑留鳥篆痕七二峯巒青在眼把笏指點爲君言

重贈實公並題其崑崙集七疊韻

詞峯峻極矗崑崙五色牟尼互吐吞名士風流俱絕調
仙童狡猾莫輕論仙童狡猾乃湘綺先生戲實公語也篋中諫草都成血
衣上天花不著痕君父恩深難報答焚香長白世尊言

八疊韻送實公入都

何人更解唱崑崙別淚臨岐各暗吞出岫無心雲自懶

冲霄有志鶴同論好憑造化回旋力重補山河破碎痕
我已辭家猶憫世公勤王事復何言

九疊韻贈葵園先生

巍然魯殿重崑崙學到河汾萬派吞自註六經傳正脈
獨持高議息羣論東山絲竹陶情緒北極星辰繞夢痕
知念時艱心更苦白頭猶復闡微言

十疊韻述懷並呈葵園先生

兩輪日月繞崑崙欲被脩羅取次吞世出世間俱有累
人非人等不須論牟尼寶殿含愁影帝釋花冠現萎痕
莫遣狂龍更流毒大鵬忍負負天言

十一 叠韻呈葉吏部

不生積謗聳崑崙誓捨殘軀肆虎吞助我能脩忍辱行
畏人不作絕交論半肩行李孤雲影一領袈裟萬淚痕
讚毀從來沒嗔喜曰魔曰佛任公言

十二 叠韻呈笠雲本師

法門望重比崑崙法海波瀾滿腹吞自掃白雲遲客至
不將丹訣與人論心香一瓣爐無燄面壁多年石有痕
我學神光思斷臂門庭立雪乞師言

十三 叠韻呈謝渭巖韻

須彌頂上踏雲霞俯視支那祇一華碧海青天鵬作屋

蘆花秋水鴈爲家人民何異生風蟻歲月真如掣電蛇
古往今來皆夢幻誰從火宅問三車

秋懷

西風吹淚上袈裟兩鬢蕭蕭感歲華老去一身渾似葉
愁來四海總無家遠公社裏蓮將落陶令籬邊菊未花
欲白空王先痛哭可憐厯劫已恒沙

感懷呈蔡伯浩觀察

蕭然瓶鉢欲何鄉垂老天涯鬢已霜出世尙爲人所忌
浮名終與道相妨秋江水落魚龍遶野寺雲生狐鼠藏
一掬西風知已淚焦桐猶遇蔡中郎

贈察使湍公八韻

湍公有道骨五欲不能醺秉節辭丹陛分曹憶白雲
舊官刑部

八公舊

燕人思舊德楚老頌新芬霜落柏臺淨風清柰苑

聞和羹期十載焜芊好重分待晝麒麟閣相隨鸞鳳羣

元根知己固案牘莫言紛他日西山頂丹成駐夕曛

喜

談丹

中秋夜偶作

太虛雲淨欲三更趺坐繩床萬慮清丹桂著花寒有影
碧梧含露靜無聲世途漸已崎嶇過吾道多因患難成
難得今宵好圓月照人偏向定中明

贈陳六笙觀察

并序

公官浙久歷任杭台諸郡由杭嘉湖道遷湖南
岳常澧道旋權衡永道己亥夏權鹽巡道署側
萬福禪林爲公供養香火處延余主席感賦六
絕以贈

錢塘江上射潮來多少魚龍勢盡摧怪底詩中有雲氣
曾扶拄杖到天台

湖海元龍意氣豪眼中甯有霍嫖姚剔鬚投幘真奇士
何止淵明懶折腰剔鬚公在蔣果敏營時事

南來爭識老人星三載清風滿洞庭應笑神仙祇耽酒

岳陽樓上幾時醒

偶移使節駐長沙老去蓬秋興倍賒
料得公餘無箇事一簾疎雨詠黃花

欲將妙筆比羲之鐵畫銀鈎老益奇
北海無人魯公死

浯溪嶽麓要新碑公曾書劃山二字方廣丈餘刻於浯溪崖壁

衡嶽高高凌紫氛
鄴侯遺澤尙流芬
憇殘爲感平生遇
替守青山與白雲

憶天台茅屋二首

昔年台嶽三間屋置向千巖萬樹尖
華頂平鋪雲作海石梁橫截水爲簾一作閉戶却看雲在牖掛簷祇用冰爲簾
多栽紅芋仍充

飯淡煮黃蘿不著鹽回憶山中無曆日看梅花卜歲將淹

壞衲蒙頭夏不溫萬峯寒翠冷心魂老猿去摘霜晨果餓虎來窺雪夜門袖底白生知海氣眉端青壓是天痕赤城合眼時仍見笑把朱霞帶日吞

憶南嶽烟霞峯舊居

懶攜瓢鉢走天涯嶽頂還思著我家沙罐夜煨紅米飯竹籃春摘白芽茶倦眠一石雲爲枕冷入千林雪作花何事人間頻乞食此心已是負煙霞

過湘陰屈子祠

湖上微霜踏葉過荒祠寥落倚巖阿湘娥隔浦啼秋竹
山鬼迷煙帶女蘿異代惟留驛客恨獨清其奈濁流何
當年不作懷沙賦終古無人弔汨羅

秋夜寄懷周笠樵舍人用見懷原韻

龍宮鐘梵暮飄蕭耿耿秋懷鬱不消籬下香憐黃菊瘦
意中人共白雲遙禪心朗印千潭月詩思寒生一葉蕉
準擬明春來問訊高吟同送百花朝

宿萬壽寺曉登雲麓宮望城中一首

理筏涉風濤杖策度林樾楓壑流遠丹桂嶺明秋潔暝
投精舍宿禪誦猶未歇高松墜寒籟深澗貯涼月寂照

兩俱融根塵忽超越晨鐘從定起幽途冒煙發浥露躋
山椒憑虛俯城闕邈矣衡嶽雲皎然湘流雪至理匪言
詮泠泠契禪說

十三疊韻贈陳默廬觀察

庚子

元龍豪氣撼崑崙吸取黃河當酒吞世事且隨雲共幻
此心宜與月同論西湖夢覺黃鸝語南浦春回碧草痕
他日寒巖煨芋熟可能來踐嬾殘言

十四疊韻與默廬論道

掀翻大海倒崑崙魔佛齊教一口吞是聖是凡名強立
非無非有意難論欲參最上真如諦淨掃虛空粉碎痕

妙意微茫須自悟豈千饒舌豈能言

戲答沈炯甫

從他腰繫紫金魚似我山居恐未如鳥解啣花猿獻果虎能守戶鶴傳書定中流水自清冷身外浮雲任卷舒欲把禪心印明月池邊種樹不妨疎

示僧可

平生所寶爍迦心不貴人施佈地金幽谷有蘭都作草
懶雲入岫豈爲霖惟愁食量隨年減且喜吟髭逐日深
蓮社交遊多礙道欲偕惠永住西林

蔡仲岐廉訪自江右寄示寓真軒詩鈔及放游錄

題此奉贈

蔡公曠達世罕儔罷官還作名山遊直浮洞庭下鄂渚
欲攜黃鶴隨白鷗匡山攀斗興更發忽放扁舟入吳越
錢湖禹穴恣冥搜鴈蕩天台詫奇絕迢遙渡海謁神京
爲愛西山爽氣清重瞻鳳闕應垂涕誰念孤臣去國情
倦游且返西江棹世外烟霞從所好不因謫宦遺塵纓
聖地靈區幾時到嗟予禪寂廢幽尋孤負蒼茫雲水心
何當一宿東林寺共聽蓮花曉漏音

憶四明山水四首

並記

天童山距甯郡六十里四明志載晉時義興禪

師結茅於茲感太白星化爲童子給侍薪水故
名天童又名太白宋王荊公及明人皆有詩山
有宏法寺舊稱玲瓏以寺西玲瓏巖得名陸游
有游玲瓏巖詩余於癸未春習定巖中一夕步
月歸寺見蛇於池蟠聳如塔忽虎聲嘯林雷雨
交作溪水陡湧數尺詢老宿云山中數十百年
龍虎必鬥鬥則海上兵起未幾法人入寇

四明山好是天童我昔誅茅住此中二十里松青夾道
萬千竿竹綠浮空長蛇盤澗水湧塔老虎嘯谷林生風
願逐白雲還絕巘頻年棲定碧玲瓏

阿育王山與天童並峙爲四明佛地按阿育王傳
王於釋迦佛涅槃百年後始生爲鐵輪王有神
力碎七寶爲末和以香泥於一夜造八萬四千
塔每塔置舍利一顆請耶舍尊者放光八萬四
千道勅諸鬼神於閻浮提選六殊勝境八吉祥
地乃安一塔中國舍利塔古十九處阿育王山
所藏其一也山有放光松以宋時舍利於松上
放光故名太宗聞舍利靈異迎入大內初以火
燒鍊色愈光旣使力士以金剛椎擊之無損痕
而椎破矣舍利光燭宮殿因額塔曰最勝光明

之塔殿爲吉祥殊勝之殿蓋舍利卽華言堅固
人能三十年固精不搖則遍體皆生舍利但無
光若佛舍利乃神應無方耳

青山如鳳欲迴翔勝境天開八吉祥舍利有光爭日月
浮圖無語閱滄桑長松偃蹇蛟龍卧古殿陰森神鬼藏
我有茅庵臨絕頂白雲應爲護禪床

雪竇山在甯波奉化縣山水爲浙東第一資聖寺
當山椒寺前諸溪匯積出奔於千丈巖巖腰一
石竇激水騰起散爲飛雪故名雪竇千丈巖與
徐鳴巖瀑皆數千丈而上中下三隱潭之瀑比

之天台石梁爲尤奇下潭側突立石笋數千仞
苔花繡錯如優波毬多入定天魔以纓絡繫其
頸循石上爲妙高臺俯視天台四明出沒雲際
如拱如揖昔宋高宗夢至一山臨海上巖壑幽
邃覺而異之詢羣臣知爲雪竇乃書應夢名山
四字榜之今石刻尚存

昔年取道入天台曾打溪橋越嶺來瀑布晴飛千澗雪
洪鐘曉動萬山雷青松有約長偕隱白髮無情老更催
却憶龍潭秋夜月夢魂時繞妙高臺

普陀山在大海中去定海三十里寒暖適宜草木

青蔚山多蛇性馴無毒論者謂大士所感又世稱紫竹林者在此是間無竹惟石色紺紫紋若黑竹然因以是得名環山皆精蘭梵刹鐘磬鏗然當夫海淨空澄登佛頂峯望之恍置身琉璃界上幾不知有人間世也梵音洞乃大士現像處四衆賭者不同吾湘郭意城先生來此瞻禮摩隨心現像四字於壁

昔余浮波入大荒一葉與之相低昂黑風險墮羅刹國白日愁渡蓮花洋舟人忽云彼岸到估客爭爇旃檀香法筵清淨未曾有海水盡放琉璃光

寄題蓮峯方廣寺並柬寶上人

踏徧衡山翠萬重舊遊吾最憶蓮峯潭光陰黝龍藏毒
草色深青鹿養茸野徑斜陽穿壞塔寺門蒼雪墜寒松
別來徒有煙霞夢塵海茫茫負此胸

陳六笙觀察寫其像爲老比邱說法狀以六美環
侍其側題曰六賊戲彌陀蓋取楞嚴六根爲賊
之義因說四偈奉讚

茫茫宦海浪掀騰此老蕭閒似野僧身未出家心已淨
故將禪悅寫溪藤

何來六賊戲彌陀都是心中自起魔迷則六根成六賊

悟時六賊六波羅

欲界凡夫祇醉迷深山愁煞老闍黎牟尼在握人誰識
顆顆能清濁水泥

維摩詰是箇中人天女何妨繞定身打破色空關榦子
觸體頭上野花春

挽朱萼生觀察二首並序

歲乙酉於黃容瑞孝廉處見君相與談越中山
水甚樂屢約爲棠坡之遊不果後數年又遇於
衡州雁峯寺自此遂不復面矣嗟嗟浮雲一別
泡影三生追憶曩游不勝悽惻因爲挽詩二章

以志蓮社之交云爾

昔時黃大令見我總論文高視無餘子清談每及君如
何林下約空望嶺頭雲四月湘山路鶯啼不可聞

衡州一爲別忽忽十年餘摩詰常多病稽康罕寄書因
悲哲人往轉覺故交疎寂寢蓮花社誰過惠遠廬

題朱孝廉夏灣別墅一首

並序

予與景喬孝廉別三年矣庚子夏五以事至棠
坡得重晤話舊極歡明日速予過談適章癡生
茂才館其家章固風雅士一見如故論詩之暇
相與嘲謔雖東坡佛印不是過也景喬稔知予

性餐餐每食必勸加予以連日言食頗倦偶假
寐却餐景喬詫甚借章戲曰師不食得毋以園
蔬味薄耶晚間當供水梭花且曰此物食水草
性潔非葷捨師五臟廟中與黃齋白粥同參禪
悅師當納受予吃吃難辨詩以答之

故人命箇輿速我至山居一笑成佳會清言論道書微
涼生砌竹細雨摘園蔬卽此有真味何須勸食魚

初伏日題宿雲律師禪房二首

碧梧葉淨自生涼三兩幽禽語夕陽閒捲疎簾坐微雨
藕花風透衲衣香

尊者慈心伏虎蛇閉門常誦妙蓮華鉢中留食知師意
應念庭槐有乳鴉

王子鴻叅軍自衡郡養疴還省贈詩一首

叅軍亦吏隱長歌遺塵纓閒居謝物役以病固其精昨
經衡嶽歸夢中山猶青念彼歛名客擾擾神無甯石火
爭微燄幽谷競虛聲豈知曠士懷不爲好爵榮高結黃
鶴契冷尋白鷗盟伊余美元度時與論金經有我卽爲
患况復有吾形淨理雖自契心月徒孤明終期妙善圓
一悟證無生

題龍萸溪明府眠琴綠陰小影

池邊雙柳樹綠色已成陰時有好靜者於茲調素琴瀟
君流水意寫我出塵心不悟鏡中影誰知絃外音

重晤陸桂亭明府

並序

辛巳冬余挂錫明州阿育王山寺公與兄桂山
茂才見訪於秋水山房誦余水清魚嚼月山靜
鳥眠雲之句極加歎賞乃偕觀金沙井玉几峯
諸勝公所居寶幢市距寺僅二里許時相過從
明年秋余因事至杭州適鄉闈揭曉公兄中式
然已於榜前謝世矣識與不識皆痛惜之時壬
午九月也越二年余還湘與公不通音問者二

十年去歲有僧自明州歸詢公近狀始知公於
數年前以進士授吾湘新田縣尹今秋公調簾
回省聞信走謁若昧生平語及舊游始得恍悟
遂相與泣然感賦此詩

背於阿育王山寺會見君家好弟兄玉几峯頭看月坐
金沙井畔踏雲行追談往事如昨日久別初逢似隔生
太息故人今宿草西風吹淚各縱橫

余旣晤桂亭明府旋送其還新田重贈以詩

二十年爲別逢君又送君何堪一揮手便隔萬重雲嶽
色隨帆轉灘聲作雨聞舟中對明月應憶白鷗羣

八月十七夜許正卿過訪贈詩依韻奉答

寂寂一鐘音浦龕坐夜深秋燈無熱燄寒樹抱冬心不是幽人至誰同冷處吟相留咒雲片勿使月輪陰

夜坐

古寺夜誰鄰孤禪影自親破窗風滅燭窺隙月尋人頗得真寂義猶留未了因晨鐘數聲動愁見六街塵

秋夜

老猿解禪定夜久亦無喧室白月在壁燈昏風動簷孤衾棲冷夢寒葉斂秋魂雨過添衣坐泉聲穿竹根

夜坐有得

丹桂吹香過碧岑
蒲團枯坐夜禪深
殘星墮戶白生室
秋鬼提燈綠入林
萬壑松寒孤鶴夢
千巖月落一猿吟
超然象外忘言說
惟有虛空印我心

八指頭陀詩續集卷之一終

八指頭陀詩續集卷二

釋敬安寄禪

碧浪湖感舊詩一首

湛湛湖中水。莪莪湖上亭。
昔余恣幽討。每偕道俗經弭。
棹掇芳荑披煙憩。寒汀俄驚鬢鬢改。
始覺歲月更陵谷。一遷變蘭蕙。
繼彫零重尋迷術。阡往迹翳荒荆。
積阜蔽遠觀。枯魚唼乾萍。
潛龍既失勢。坼龜今成形。
逝川無迴波。浮雲靡停征。
衰草競秋綠。寒山猶舊青。
感故生新悲。觀空有餘情。

山行既暝還憩松寮宴坐有得述爲偈言

山人午睡罷山鳥時一鳴悠然起逸興縱步林間行溪
雨散微涼空翠搖孤清叢竹翳荒澗秋桂流遠馨白雲
賞我趣夾路如將迎林深不見人稍辨歸樵聲幽情既
已愜植杖返柴荆煙蘿含暝色鐘梵何泠泠夜深禪更
寂松際月孤明靜對忽忘照身心亦已冥言思難恍惚
强名曰無生無生豈可證一悟躋元局神會罕與同默
默空含情

陳仲鹿觀察需次湖北新奉奏調陝甘將赴行在
來湘省親病故於鹽署賦五律十八韻哀之

二聖蒙塵日羣凶亂國辰生靈苦塗炭宮殿化荆榛戡

暴須良佐扶危倚哲人正平才絕俗文舉薦殊倫黃屋
求賢急丹書拜命新趨庭方適楚赴闕卽過秦鬼伯何
相促天公甯見嗔西河揮老淚南嶽失芳鄰煨芋竟誰
贈歌蒿獨愴神彭殤均大化支許或前因白社論交晚
青門悵別頻幾會淹日月終古卧松筠苦冷題詩壁香
餘灑酒巾含悽開梵筴隕涕望楓宸徒切看雲思難留
砥柱身撫時空憤激嘆逝屢酸辛欲下巫咸問還將楚
些陳恐傷顏路意不敢哭回仁

義甯陳中丞挽詩二首

疾雨驚雷挾嶽馳天南一柱遂難支滄波東海橫流急

白首西山挂笏遲功罪一時原未定春秋千古豈能私
鄂州遺愛何容泯應爲公刊墮淚碑

見說辭家四十霜歸來舊業已全荒既無彭澤五株柳
那有成都八百桑死痛青山難葬骨生憐白鶴與休糧
公罷官後結廬西山嘗蓄一鶴自隨今歲先公而逝公哀之爲銘以達
道人平等無恩怨猶自潛然對夕陽

李郁華明府以石濤所畫老樹枯禪圖索題圖中
原題有空山老樹一坐四十九字因反其
意爲四偈

莫倚藏身有此圖如如不動祇跏趺忽然劫火燒塵刹

留得空山老樹無

一瞬恒沙劫數過休云是定祇名魔因他不解禪宗意
死水徒然不起波

此事須憑一悟真虛空粉碎露全身回觀文字皆糟粕
有口何能舉似人

末劫刀兵苦事叢瘡痍滿目盡哀鴻阿師若具慈悲力
何忍低眉坐樹中

山居書懷十二韻

二十餘年事回思淚卽傾每憐龍象泣不避虎狼行毒
草終難剪幽蘭恥競榮身全緣兜力道退誤詩名未證

三乘果空堅五字城苦吟生白髮多病覓黃精坐久蒲團破寒深布被輕老來耽靜僻客至懶逢迎苔蘚沿階上藤蘿向屋橫池虛惟受月樹密但聞鶯冷翠藏陰壑微雲養太清祇嫌樵子過使我小猿驚

遣興

鎮日蒲團坐若痴興來說偈便成詩傍人若問余何事也要消閒十二時

感事二首爲王莘田作

皎皎晴虛絕點塵忽然雷火欲焚身老僧冷坐蒲團上不信曾參竟殺人君與某姓名相同被誣幸大吏公明得釋

一紙疑書是禍根小民忍痛復何言始憐湛湛湘江水
終古沈冤有屈原

山居戲作

青菜堆盤任飽餐幽居有味却難言風雲變幻悲塵世
草木榮枯見道根孤月自澄潭底影千花徒艷鏡中痕
老來豪氣消磨盡閒戲癡猿擲果吞

書懷兼呈梁孝廉

結習惟餘文字存每憑定力攝詩魂鬚從撲斷吟逾苦
一字吟成一淚痕

由來此事解人稀白首淒其向翠微雨過楓林秋瑟瑟

孤雲一片冷無依

却抱瑤琴不忍彈
松根燬磬聲殘衲衣
夜冷知山雪
明月梅花祇自看

欲把幽懷語向君
青天一鶴久離羣
人間無處留清夢
長在千峯頂上雲

贈張辛伯先生

八十一翁如後生
出門無杖亦能行
兒時親炙阮文達
老輩平交何子貞公與何貞老俱
出阮文達門下
台嶽看雲曾獨往
洞庭醉月每孤傾
不須更問禪宗意
閱盡滄桑道眼明

贈沈烟甫卽次葛倦翁原韻

沈子抱孤憤雞中鶴出羣心齋能學佛筆陣自成軍人
道輕朱紱尋僧話白雲相交真莫逆不獨在論文

贈吳漁川太守六首

並序

庚子七月夷兵犯京師兩宮率王大臣貝勒數
人微服出狩閱二日人馬飢憊時公方宰懷來
奔赴榆林鎮躬迎車駕入城始進服膳慈聖泣
曰我出京至爾邑沿途不見一百姓何況官耶
汝獨迎我誠忠臣也語及義和團民卽痛哭失
聲蓋邊禍實由民教相仇也明日起蹕西巡擢
公知府未幾命赴兩湖催餉余與公別十年矣

重晤長沙爲述二聖蒙塵情事及恩遇之隆相
與痛哭於其行也賦五律六章以贈之

故人不相見幾度薊門秋忽奉秦中詔還爲湘上遊白
雲聊共話滄海尙橫流一掬傷心淚南來灑未休

煙塵方湏洞朝士半偷生念子將王命慚余憇化城空
云龍象力難息虎狼爭欲上祝融頂迢遙哭帝京

強鄰何太酷塗炭我生靈北地嗟成赤西山慘不青陵
園今牧馬宮殿祇飛螢太息蘆溝水惟餘戰血腥

聞說西巡日慈輿涕淚頻可憐堆白骨祇是痛黃巾邊
地猶防寇長途不見人倉皇二百里供帳始微臣

莫小懷來縣曾停帝后車園蔬充御膳官舍奉宸居
奇遇人皆說忠臣聖所舉不知沾雨露感激更何如

天涯歲云暮王路復馳驅絕塞一鴻遠遙天片月孤行
吟辭白社歸夢繞黃圖回首衡雲隔還能相憶無

羅順循大令自直隸新歸又有日本之行作此贈

別

死地生還又別家一身如葉去中華秋風日落田橫島
海色寒生博望槎豺虎未平空有恨魚龍相狎靜無譁
扶桑到日應重九何處登高對菊花

題劉樸堂觀察白雲課耕圖

峩峩滄山高湛湛滄水流中有素心人愛此林壑幽豈忘稼穡難繞屋皆田疇田夫力作苦歲時無少休晨光猶未晞烟中聞叱牛山人憫其勞壺漿每見酬曰農聽余言富貴豈外求勿辭四體勤五穀豐有秋披圖識深意望雲心悠悠

寄葵園老人二首

九天一疏大璫驚垂老煙霞慙野情應笑山僧未忘我與人猶自競詩名

老人老矣復何求白首栽松爲鶴謀今日巢棲霜露淨西風長憶仲宣樓

人天隕泣宗社蕪昭陵魏侯烈丈夫古之任俠今則無
赤手欲將天柱扶龍泉三尺隨身俱酒酣看劍長歎吁
國仇那敢忘須臾青天朗朗明月孤行矣努力毋踟躕
殲除毒虺斬豐狐妖魅閃屍伏其辜血腥盪滌劍不汙
功成皈依佛之徒老僧待子蒲團蒲

武陵春傳奇書後

世已無淨土煙波寄此身長謠楚天暮一曲武陵春時
事紛棋局生涯托釣綸滄浪何處是滿目但迷津
而我出世者幽憂未可言有身成大患無地著空門塞
海哀精衛蒙塵痛至尊含悽向漁父休更說桃源

贈日本中炯舍山

君從日出處萬里到潭州時事滄桑感風濤海國秋不辭遠行役豈但美遨遊相對情何極高吟月滿樓

懷日本岡千仞卽次甲申夏日遊四明天童玲瓏

巖原韻

高人白首卧東瀛應憶天童水石清洞古苔深無客到嚴陰晝靜有蟬鳴松杉曾見當年植鐘梵同聽下界聲雲海茫茫萬餘里因緣強自說來生

寄遜叟

九江廬阜下遜叟此棲遲常遣青鸞馭遙招白老兒哀

時餘涕淚辟世有須眉安得隨吟杖青山掇紫芝

白老見西山得道隣
精數降乩與公和詩

上林寺入院示眾

上林鬱旃檀不雜凡木香龍象此蹴踏豈容狐兔藏敬也暗內修虛名徒外揚自僻雨華請久與人天荒焉知十二載避席仍升堂寂寂本無照冥冥似有將願爲甘露雲普蔭火宇涼願融百毒味併作醍醐嘗敢告大眾言努力各自強勿隨識浪鼓沒我浮海囊勿被毘嵐風撼我須彌王此事如磨鏡垢淨自生光但令狂心歇卽是菩提場

辛丑夏俞壽臣旣歸江南爲詩補贈湘江之別並

寄其兄恪士觀察陳伯嚴考功兩家父子次錢

牧齋贈別蕭白玉原韻十首

久矣萬緣寂其餘別思何空持投轄意還忍聽驪歌湘

上春愁遠江南煙景多因之憫吾弟無計慰蹉跎

胞弟子成

江南流落

音塵雖已隔猶自悵離筵白榜春波棹黃梅細雨天重
逢方匝月小別已經年不折垂楊贈柔條亦可憐

卻憶陳公子追隨似目前因開白蓮社同放碧湖船高
閣坐秋雨孤蟬吟夕烟舊遊那忍說彈指十餘年

元武湖中月遙知泛短篷涼生蒲葉雨香送藕花風悵
望千山外沉吟五字中離懷無處寫珍重託郵筒

勝遊難再遇回首一沾衣舊雨幾人在孤雲獨自飛寒
燒柂柂火久息箭鋒機他日匡山頂相期皓首歸

比部別余久改官淮水濱買山曾有約踏海復無人萬
戶同聲哭四夷何日賓九原如可作應更泣孤臣謂因
覺老

人

出世嗟無補含懷卧紺園旣傷麟在野還慮虎窺藩靜
覺風幡動苦吟霜鬢繁知君情更切不寐月臨軒

悽郎子恪士及師子伯嚴與我有幽期皎月光初滿浮雲

子

人五言詩卷之二
十一
變豈知分飛從此日把晤更何時天地荆榛塞徒然眷所思

且自拈花笑休懷厝火憂求仙原是妄媚鬼亦堪羞易到無爲地難乘有漏舟故鄉期共返莫祇認并州浮生如旅泊大刦祇崇朝早避紅羊出堅辭白璧招澄心觀水月托迹向漁樵若悟無生理封書慰寂寥

夢洞庭得句

昨夢浮杯渡洞庭湖波汨汨雲冥冥岳陽樓上坐吹笛飄落君山一髮青

八指頭陀詩續集卷之二終

八指頭陀詩續集卷三

釋敬安寄禪

酬但方伯惠扇

煩暑忽已失仁風
忻奉揚如臨谿石
坐自覺衲衣涼老
樹生新蔭幽蘭吐妙香
何當慰黎庶
披拂及林塘

疊前韻再贈

此老漫云老摩雲
健翮揚高齋
談淨理一雨送微涼
鳥雜梵音語
風繙貝葉香
謝公詩興好
青草滿池塘

雨後茅亭小憩二疊前韻

茅亭宜宴坐
鳥語自幽揚
綠竹洗寒翠
碧梧生夜涼
禪

心無住相佛火有餘香定起看明月荷風來曲塘

桐桂山館三疊前韻

山館蘊芳馥清風時一揚庭陰不知午心定自生涼竹

几繙經倦藤花落枕香遙憐遊子夢千里下瞿塘

公長公子

子英太守將由蜀奔母喪來湘

感事復呈四疊前韻

時事方棘手王風久不揚江湖波氾濫天地色淒涼獨
灑憂時淚長焚靜夜香知公心更苦請築捍潮塘

酬龔龍陽五疊前韻

哲人若蘭蕙芳馥靜彌揚真想不隨俗清吟自灑涼公

磨心作鏡我爇戒爲香談笑入淨理蓮花開野塘

憶天台方廣寺

天台方廣寺杖錫憶曾經虎吼山欲動龍潛水亦腥仙
雲千嶂白鬼氣一燈青靈境難重到幽懷未易冥

題城南金剛院

城南古蘭若客至澹忘歸地僻囂塵遠堂深梵磬微嶽
痕青入夢雲氣白侵衣欲乞坐具地安禪靜掩扉

程子大讀余四明山水詩有贈次韻奉答

十載游踪徧浙東海濤翻雪吼洪鐘蒲帆泛月尋幽島
竹杖挑雲入亂峯最憶普陀浮海刹難忘舍利放光松

報君一語君應怖曾向空潭咒毒龍

四明深處舊禪房海色猶來夢裡蒼太白峯爲山所祖
大龍湫是瀑之王烟霞有約愁難踐松菊無人想就荒
今日因君話甌越萬重雲水自茫茫

送陳伯屏方伯入覲

忽辭蘿薜理行裝千里乘風謁

帝鄉卻指雲山留後約便隨鴻鵠起高翔湘城夜雨星
辰濕蹕路秋花劍佩香臨別殷勤煨芋贈十年箇味要
親嘗

省曇和尚自醴陵來索題雲巖寺詩

見說雲巖寺天然境最清幽泉穿樹出有泉自樹中出者爲枯木井
峭壁碍雲行萬籟隨鐘寂雙池受月明寥寥坐禪地應
可證無生

靈巖飛翠連衡嶽大刹知名冠醴陵萬古天青墮爲石
中宵鬼綠聚成燈老猿伏澗啼秋雨饑鼠緣松嚼瘦藤
何日雲間結茅屋白頭相伴兩三僧

哭黃大令荅瑞三首

蓬人輒自嘔心肝古道懸知入世難祇合山林充大隱
強求菽水就微官十年五斗緣猶薄一死孤雲影更單
夢裏相逢還似昔贈衣應念老僧寒昨夢大令過訴贈衣話舊情致殊殷

詞客江南信可哀魂兮何日始歸來名山竟負當年約
亂世虛生絕代才地下修文應有俸人間避債已無臺
好將平日憂時淚灑作黃泉酒一杯

支許論交十七年回思往事益淒然種運同結碧湖社
煮茗曾分白鶴泉自許漆園爲傲吏獨推賈島是詩仙
觀空尙潰袋袋淚不是尋常哭逝川

聞陳考功窮居江南尙能周恤死友黃蓉瑞大令
感其風義作此寄之

謫宦棲遲淮水邊故人貧病尙相憐興來共蠟遊山屐
窘極猶分買藥錢天上玉樓傳詔夜人間金幣議和年

哀時哭友無窮淚夜雨江南應未眠

送王翊鈞參軍之官浙江

浙中地勝擬蓬萊薄宦於茲亦快哉台嶽天青雲海現
胥江濤白雪山來扁舟夜泛湖心月孤嶼春尋水面梅
他日衙齋公牘少清遊應喜道人陪

送俞壽臣觀察之江南時舍弟子成方謀食江淮
並及之

木落秋心苦何堪送故人煙霞老難別骨肉罕相親請
以愛我厚轉爲憐弟貧江南千里道悵望一沾巾

十月初三夜夢中得詩一首

求珠滄海驚龍眠
萬家香飯歸禪鉢
八部花雲散法筵
兜率蓬萊俱不着
蓮華佛國息吾肩

十月初五谷山掃剃度本師墓

微霜下林杪木葉皆飛黃
送師瘞斯土俄已三重陽茲
來一展眺風物殊蒼涼
秋山靄餘翠殘菊猶芬芳憶我
蘿染時傳衣披我長師年未五十鬚鬢俱青蒼
師命我行脚遠帆南海航一身托雲水十載還沅湘
師年六十六面皺身則強日行三由旬迅若空鳥翔
如何十四年老病成頹唐我從鴻山歸侍疾未離牀
我每泣語師請

憤溫與涼師笑謂我言是身真革囊盛穢無一淨捨之復何傷若人負重債於理豈不償五陰旣非有四大隨分張師竟棄我去游神泥洹鄉慧燈寢恒照苦海失津梁四流欲誰濟昏夜何茫茫緬懷平生儀灑涕對迴崗山川有搖落斯痛永無央

由谷王山越嶺行至寶林菴時常長老爲其徒敏真徒孫性華修墓工竣敏在日與余言道甚洽歿已二十八年性則爲余法嗣因作詩一首志

感兼呈常公

峭嶺蘿徑微抗袂越雲行叢薄帶暝色寶林開化城常

師此駐錫頭白罕所營羣推法門舊與余爲弟兄吁嗟
三十載迅若流電驚念公賢弟子實爲柰苑英慧悟信
絕倫惜不永其齡性也繼敏秀從我問無生無生詎有
滅高塚何崢嶸寂子豈真寂林鳥演梵聲皎皎雲間月
猶似道眼神理固仍在老淚徒縱橫勿爲逝者哀存
歿皆凡情

送和菴上人主錫嶽麓萬壽寺

蘭若關西晉法崇實初祖衡山何巖巖分秀鍾靈宇孤
城隔湘波經臺隱烟樹風篁響梵音鶴泉流法乳我昔
維摩室瓣香笠雲圃笠雲圃公爲余嶽麓得法本師鈍根負虛望於道

曾無補上人有雄力龍象繩其武旣應大衆請詎畏羣

魔侮願彼箋戾車同沾甘露雨伊余忝法親來聽上堂

鼓卻笑鴻山牛

和真爲余
鴻山法嗣
麓山寺有虎岑

今作虎岑

唐景岑禪師
虎堂

遺事見
傳燈錄

郭調白大令招集碧湖爲展重陽會卽席有作

霜寒天宇淨碧雲生微陰鳥沒烟際帆鐘清湖上林夫
君敦古歡良辰展幽尋駕言踐靈約繩焉穆余襟伊蒲
悅禪味迦葉動苦吟青條殞秋露黃菊艷餘金歲宴興
未闌交新意逾深前塵悵已渺眞賞忻在今勝游安可

紀聊用謝知音

前詩未竟其意復紀一律

紫微山上碧湖宮轉瞬浮雲往事空高士蓮花還結社
老僧霜鬢已成翁十年再展重陽會一座惟餘二妙同
謂曼刀潤民二公曾侍玉池老人展重陽於此太息玉池今宿草忍聽落木動西風

碧湖懷古疊前韻

湘春門外馬王宮五代荒涼霸業空閱盡繁華成老衲
漫將時事問漁翁湖山亦逐滄桑變天地徒看日月同塵世興亡何足論且携長笛弄松風

孫姬瑞孝廉聞余談浙東山水有贈次韻答之

飄然十載浙東游。皋壤生涯信謬悠。鐵鉢夜敲青嶂月。
銅瓶曉漱碧潭秋。定中水闌窺龍窟。眼底雲生結蜃樓。
更擬明年渡瀛海。扶桑咫尺引吾舟。

袁叔輿戶部寄示金陵詩社門存唱酬韻見懷之

作次韻奉酬 王寅

臥雪清承舊德門。新詩遙寄到荒村。一時相見風流盛。
千里如聞笑語喧。戀闕定迴金鎖夢。採春初返玉梅魂。
終當杖錫來相訪。割取安禪片石存。

寄題易哭庵觀察廬山琴志樓疊前韻

大好琴樓近石門。等閒拋却綠蘿村。且尋笠屐林巒約。

遠避風濤海國喧三峽泉聲蘇渴病五峰雲氣淨詩魂
匡廬山色清如許中有蓮花舊社存

懷義甯陳吏部三立再登前韻

聞君打槳返章門拄杖時尋郭外村襟上長餘山氣潤
花間微覺鳥聲喧舊游可憶白雲侶近事應傷碧海魂
彈指滄桑紛萬變中原一片夕陽存

憶金陵舊游三疊前韻

托鉢曾沿白下門西風黃葉舊時村鍾山月出夜禪寂
淮水潮生午渡喧萬古烟雲悲過客六朝花雨冷香魂
定林寺裏經行處妙意微茫空自存

東坡有妙意持行定林寺及妙意有行

在終微
范之句

述懷答友人四疊前韻

何分白屋與朱門俯視閭浮等一村施食每憐山鬼嘯
安禪曾制毒龍喧沽來蓮社高人酒醉倒梅花處士魂
文字情深道緣淺多生結習恨仍存

寄陳公孫師曾五疊前韻

公孫宿世我同門甬上猶留乞食村山色當窗常在定
潮音振海了無喧會參柏子禪宗話僧問趙州如何是祖師西來意州云
庭前柏樹子錯認桃花倩女魂萬古青天堪作證浮雲散盡

月孤存

贈陶荔南

陶公奇氣若無人，垢面蓬頭率性真。
一卷孤吟寫冰雪，空山茅屋自生春。

如子信有貧賤癖，鮮衣美食轉生嫌。
省城隍廟無常側，鬼語啾啾睡未甜。

日本岡千仞寄次甲申夏同游天童玲瓏巖韻見懷并所著觀光紀游感疊原韻二首

尺書報我自東瀛，屐讀如聞笑語清。
春水綠波人萬里，幽谿碧樹鳥孤鳴。
觀空猶憶前塵影，問訛還勞遠寄聲。
一別玲瓏巖下路，滄桑百感竟叢生。

每聞海客話東瀛風俗還如太古清所學皆能爲世用
其人不僅以詩鳴閒雲亦抱爲霖意野鳥都含讚佛聲
中日本來唇齒國掣鯨休使海波生

姜市掃周孺人墓

并序

周孺人者余同里李春圃母余幼失怙恃爲人
牧牛數過其門孺人知余爲孤兒常呼與語躬
爲縫衣櫛髮慈惠備至余出家後孺人見之哭
云汝奈何爲此也今春二月余應四明天童寺
請還里拜辭先塋詢之則孺人歿已十年矣因
謁其墓爲五絕四章以代哭云

昔人感一飯千金報其恩我懷李母德袈裟拜墓門
未拜涕先流兒時此牧牛憫我無母兒時常梳我頭
禪年失怙恃捨母無所依我飢飽我食我寒溫我衣
欲去復躊躇遺恨此山隅惟將雙淚痕流作報恩珠

長沙上林寺退院將之天童辭衆二首

粥飯緣輕祇一年無端又泛漸東船此心不動隨來去
一月千江普映圓

無窮離思水雲寬龍象依依欲別難白首忽辭湘上去
青山長向越中看

由長沙上林赴四明天童寺請回憶湘中故舊愴

然有作

老作離鄉客迢遙憶故關夢回湘上寺人在越中山舊雨忽爲別孤雲今又還龍潭照鬚髮不似昔時顏

甯郡高公子吹篪司馬奉其母李夫人來山修建水陸以詩見贈次韻三首奉答

法雨灑初地慈雲生遠陰如何天上曲來和草間吟靜室絕塵想清言慙素襟賞音今已遇不在伯牙琴

六一賢太守甘棠列郡陰因陪公子話還憶醉翁吟白雪聞君咏清風快我襟何須奏流水悅耳自成琴

誰愛天童寺喬松廿里陰客從雲外至僧在定中吟谿

竹淨搖翠巖花香滿襟時焚柏子坐弄我沒弦琴

天童寺書感

十八年來復此游蕭然不覺雪盈頭名山事業吾何有
塵世滄桑佛亦愁太白峰前雲似蓋玲瓏巖下月如鉤
平生無限傷心淚稽首空王獨自流

夜過瓜洲鎮

江寒五月似新秋隱隱金焦水上浮夜半鐘聲呼客起
朦朧烟月過瓜洲

自四明歸長沙經洞庭作

湖上微風水不波片帆無恙夜重過長沙此去翻成客

歸夢如山向越多

將歸四明別朱八菊尊

甬上初還又別君滄桑時事豈堪聞道人避地向吳越
閒聽清猿嘯白雲

題李仲乾悼亡詞後二首

潘岳悼亡情太癡道人一見欲焚之誰將天女紺青髮
繫汝茫茫萬古思

曠刱沈淪失此心情塵擾擾淚波深華髮一墜仙緣盡
海碧天青何處尋

羅順循大令將之燕臺余亦有四明之行作此志

別

十載重逢鬢已絲布帆明日又天涯風塵擾擾向誰語
雲水茫茫安可期海上鯢鯨方作窟山中鸞鶴欲無枝
惟餘一片青天月越嶠燕臺照別離

赤壁懷東坡居士

坡仙人去已千秋赤壁還思前後游寂寂江山共誰語
一帆明月過黃州

新堤

江豚吹浪與人齊江鳥呼風日色低隱隱帆檣泊雲際
青蘆一片是新堤

題紅雨樓遺稿

紅雨樓頭踏翠過落花芳草恨如何美人黃土埋香久
司馬青衫漬淚多入道宜醒蝴蝶夢傷心莫聽鶯鵡歌
今看柳絮因風起想見當年謝文娥

海上與真上人話舊

孤雲本無定於此忽相逢巖壑思前事鬚眉非舊容霜
寒洞庭葉風送海門鐘明日一揮手秋山又萬重

感事

嚴谷容吾輩天朝雨露偏祇緣充學費遂議割僧田古
寺畫常閉禪房夜不眠何當乞甘露一爲洗腥羶

寶慶寺掃慧公塔

慧老久云寂追思亦可傷振衣登太白把晤記錢塘歲
月去如電鬚眉漸有霜夕陽瞻塔影不覺淚成行

重晤樓杞伯

十餘年不見一見淚雙流舊雨幾人在孤雲獨自留西
風吹短鬢落日下高樓昔別君方壯今來成白頭

重晤胡俊卿李子仙兩秀才

明州再到事堪哀白髮惟餘兩秀才一棹還湘驚歲晚
寒梅二十度花開

王寅秋瞿芷垣司馬偕馬芥堂明府枉顧天童與

芷翁話舊得兩絕句又作二首送馬公歸蜀并
東陳粒唐觀察陳有東山草堂十二圖東山雲
岫其一也

故人不見十餘年留結空山一宿緣看月聽猿思舊事
松風涼露夜難眠

回憶湘樓夜雪時敲冰煮茗坐談詩那知人事今來變
頭白空山此住持

西蜀山川天下雄崎嶇道路說蠶叢請看太白青蓮海
可似峨嵋翠掃空

錦江秋色故居欲寄迢遙一紙書莫忘東山好林壑

閒雲出岫近何如

寶幢重過何珊瑚秀才宅

寶幢河邊處士居青山頭白尙攤書故人寥落鬚眉在一笑浮雲萬變餘

上虞經君甫居士來山以詩見贈次韻奉酬

上虞老居士邂逅喜相逢得句題紅葉開軒對碧峰知公愛淨理與我諭機鋒一笑林塘暝高樓動晚鐘

禪心老何似死水不生波雨過青山淨秋來白髮多飛雲思出岫倦鳥懶移柯遠辱高人顧因之發浩歌

次經君甫居士留別原韻卽送其歸鏡湖

無人共聽蓮花漏有客來參柏子禪自許烟霞爲道友
不妨松鶴與忘年清宵醉月焚香坐白晝看雲枕石眠
何事便隨流水去青山紅樹放歸船

空山煮石斷炊時長者黃金肯佈施懶作昌黎排佛論
苦吟潘岳悼亡詞連朝聽梵心如水一夕悲秋鬢已絲
歸到鏡湖烟景好白雲黃葉入新詩

題盧吟秋茂才夢紅蓮詩卷

盧生才豔是神仙慧業多生豈偶然一卷夢紅詩卷子
風情不減杜樊川

聽唱蓮花格調新能令枯樹一生春虞山不作梅村死

肯與漁洋作後塵

老去禪心百不思偶然乘興爲題詩却憐一管生花筆
祇作癡人說夢詞

秋日病中漫興次洪純伯明經見贈原韻二首

恒沙刲骨盡燒然猶有文人未了緣靈運多才後成佛
孟公無慧早生天病容已似秋山瘦詩卷空勞島國傳
時日本僧方購余拙集還國欲咒蓮花生鉢底毒龍吐霧漫相纏

高士文章海內雄清狂應與老僧同蕭梁以後無才子
趙宋之間有放翁陸詩情韻俱絕又極自然非詩人所能易及不許盧仝爲
茗友余少年茶量最宏一飲數十甌盧仝七碗何足道却呼賈島是詩僮浪吟

直欲凌窮髮鵬背星寒任颶風

招鄞邑侯黃鞠友司馬游天童

太白峰高接四明玲瓏巖古最馳名花開花落知春夏
雲滅雲生驥雨晴八月木樨香可好六時仙梵夜彌清
探尋宜趁簿書暇特遺長庚下界迎

爲翟少府題畫二首

秋山紅葉豔於花小艇橫江日欲斜着箇茆亭深樹裏
幽谿鹿過便爲家

隱隱花宮在上頭下方水木湛清幽雲巖深處宜禪寂
瀑布無人冷噴秋

寄懷俞恪士觀察江南并柬陳伯嚴吏部十二首
并序 癸卯

元宵後一日懷弟子成自金陵來盛稱觀察俞公雅意因爲七絕十二首奉懷并柬陳吏部蓋歲己丑吾湘鄧彌芝先生應許仙屏方伯聘主講金陵曾文正書院約余由衡州同舟東下時觀察與吏部及曾重伯吳雁舟兩太史俱自京師還湘會於白門日事游眺一時盛會也今許鄧均歸道山曾吳皆遠宦蠻荒公以道員需次兩江吏部亦作寓公於此云

昔時湘上聽離歌轉瞬狂瀾喚奈何淮海千帆爭利涉
想君因更慎風波

公昔由湘之官自下行至靖
捲遇暴風舟幾覆有書報余

塵世紛紛變態新蒼山面目亦藏真芒鞋獨上千峰頂
倚杖看雲憶故人

一自揚帆下洞庭猿吟鶴唳不堪聽江南江北山無數
長入枯禪夢裏青

去年飛錫向長庚

長庚又名太白卽天童也

繞道還思入石城風利

舟行不能泊青山遙望但含情

萬松青繞夜禪殘對月題詩淚暗彈多謝鳳凰臺畔客

春風猶念鵠鵠寒

子成落魄江淮
蒙公爲之提獎

一池新漲綠於藍千里離懷老不堪料得官梅動詩興
十分春色在江南

若棹扁舟向浙東青天一髮是天童謝公行處今猶在
好看名山入剡中

斷巖千尺一枝藤終日凝然萬慮澄爲我寄聲陳吏部
匡山留待白頭僧

吏部與余有歸老匡山之約

白門佳會幾何時回首人間鬢已絲記否秦淮雙槳過
花枝爭拜老禪師

昔公與吏部約余游北極閣歸舟過秦淮河吏部獨上岸使女士數人於

樓上合掌呼入指禪師者再

香湖居士舊詩人元度交情老更親太息兩公俱物化

回思往事一沾巾

雞鳴寺裏憶偕行鐘梵蕭蕭洗耳清夜半霜風驚折竹
依稀微月定中明

元武湖邊共倚樓藕花如雪隱行舟何時復逐輕鷗去
雲水光中續舊游

黃鞠友司馬以小林棲詩四首見示次韻奉贈再
速天童之游

林棲誰爲小仙鶴此中巢白雪難爲和緇衣敢諭交詩
情清似水道味合如膠惟負名山約峰巒欲獻嘲
一縣春風暖青山入夢無流鶯欣得樹過雁穩啣蘆種

柳心雖切栽花計豈迂欲圖三嘯樂應顧虎谿廬

暫拋黃綬事且慰綠蘿心小艇生波細長松夾道深但看千嶂合不受一塵侵待掃雲邊石谿聲共苦吟

我亦幽棲者依巖屋數椽松窻延月朗竹簾引泉便得句還呈佛忘機欲廢禪偶聞樵客語因識使君賢

趙仲青二尹曾爲衡陽令鄭湛侯明府書記別十年矣今遊宦四明知余主席天童爲詩見寄次韻奉酬兼懷湛老

天涯書劍遠翩翩感舊知憐老鄭虔三絕白頭猶薄宦一官黃口亦爭賢故人應有停雲作懶衲還存煨芋緣

今日吳霜俱點鬢論交怕說十年前

前詩未竟其意復成絕句十五首追懷往事并訂

天童之游

一辭衡郡十經秋風雨長懷趙倚樓野鶴聞雲雨無定
分飛何意到明州

昔時朋輩半彫零落木寒泉不忍聽幾度衡陽孤雁過
惟餘嶽色向人青

鄭公樗散鬢蕭疏寂寞長沙憶舊居解印歸來復何有
殘年乞米向僧厨

共稱陳實有佳兒

謂湛老子叔獻孝廉

痛惜曇花一現時留得

衰翁貧病在眼枯無淚向人悲

白髮休文老幕賓

謂湘潭
忤子粹

當時才調更誰倫前年亦報

湘潭死曾對梅花哭故人

人生如寄復何常回首前塵枉斷腸吳越山川堪送老
與君不用憶衡湘

天童名勝冠東南佛地羣推古刹竿萬疊烟巒青在眼
試扶柱杖恣幽探

玲瓏巖在寺之西陡削登天不用梯翠壁蒼苔待君掃

新詩好和放翁題

陸放翁有題
玲瓏巖詩

上古巢棲無一楹義公梵行感金精侍供薪水來童子

從此青山有姓名

晉時義興禪師於此誅茅感太白星化爲童子供給薪水故以名山

太白峰高蘿徑微登臨翻訝鳥低飛蓬山咫尺通呼吸

欲挾星辰下界歸

巖谷重重覆碧蘿此中幽趣引人多涓涓不斷龍潭水竹簞穿雲入飯鍋

十里長松青到門雙池如鏡淨無痕晉時蘭若千年樹猶有庭前古柏存

義興禪師手植獅子柏尙存

天下禪宗宿所稱傳衣自昔有神僧惟持一點光明種

散作人間無盡燈

密雲悟禪師中興天童其枝葉偏佈海內故稱天童爲天下禪宗

雲門餅子趙州茶個味能嘗是作家雪後園林尋虎跡

寒窗分韻鬪尖句

隔水幽花入戶香時來雲氣濕衣裳呼童淨洗谿邊石
待與高人話夕陽

八指頭陀詩續集卷之三終